



**Sächzäänte Joorgang**

**Fasnacht 2013**

## Die Gsalzene

Dä Summer het me z'Öerlikon e Huus nach Oschte gschoobe  
Das isch ändlig mol e Laischtig vo de Ziircher wo d'kasch loobe  
Jetzt wo sie lebig hän, do kennte sie - mir wurde das seer schetzte  
S'neggscht Mool die ganzi Stadt grad bis noch Eeschtryych wäg versetze

Die Bandi het nur Lampe, doorum het's uns irritiert,  
Dass d'EU dr Nobälbryys fir dr Friede abgarniert  
Drum miesst me - wurd me sone schreegi Logik wyterfiere -  
Fir dr Chemie-Nobälbryys ändlig dr Lance Armstrong nominiere

Unsri Fraue kemme immer z'spoot, si butze nimme rächt  
S'WC dräggig, s'Bier isch warm, vom Ässe wird's uns schlächt  
Und dä myysi Service koschtet uns am Ändi immer mee  
Unsri Ehe sinn halt wie 'ne Zugfaart mit dr SBB

Frytig, eerschte Februar - dr Daag zem sich konstituere  
Doch d'Regierig z'Basel muess no warte, das duet iiriere  
Eerscht am Määntig goot's denn los - au wenn me's lieber anderscht wett  
Will dr Baschi Dürr am Frytig immer Butz- und Wäschdaag het

Dr Wöschi Baschi wäscht si Wösch e jede Frytig Morge  
Mit Schurz und Wischmobb wott dä Ma fyr d'Sicherhait in Basel sorge  
Däm Männli Maischter Proper z'sage, do spricht nyt drfir  
E haissi Glatze hett äär zwar, doch sini Gstalt die isch vyl z'Dürr

An dr GV vo de Sioux im Indianerreservat  
Said dr Haptling «Fetter Elch» zem Haptling «kleiner Kopfsalat»:  
«Los, so laid's mr duet, I muess Di päggle und drzue aafauche  
Will sit die Fumoir schliesse ka me kuum me Friedenspfyffe rauche!»

Dr FC Sion hett mee Trainer gha als Fans uff syne Räng  
Au mit Alggohool verstoosch nit de St. Galler iri Gsäng  
Zem d'Ynaame verdopple duet me d'GC Spieler zwinge  
Ab jetzt an d'Haimspiel je e aigne Zueschauer mitzbringe  
Vom Schutte hänn die z'Lausanne unde gar kai blasse Dunsch  
Bim FC Thun doo isch dr Raase effektiv die ainzig Kunsch  
Bi Servette isch s'Bedryybigesamt dr allertreuschti Gascht  
YB wird «gäng» Maischter, doch wie immer numme fascht  
Luzern und Ziiri geen uff d'Närve, bis zem bittere Änd  
Zwaiezwanzig linggi Fliess, und je e gsteerte Bresidänt  
So wie die Pflutte schutte und die Clübli sich gebärde  
Muess halt dr FCB au das Joor wieder Schwyzer Maischter wärde  
Luftschutzkäller, Nootrazioone, Helm mit Gruebelambe draa  
Wär an Kaländer vo de Maya glaubt, het harti Zyte ghaa  
Das Theater het uns nit beriirt, dr Schloof nit kenne raube  
Will mir brinzibiell nur an Kaländer vom Pirelli glaube

### ... und dr Monschervärs

Villicht wisse Si das noni  
Wär lausig schafft hett drotzdäm Boni  
Doch fir d'Abzogger wird's schint's bitter  
Die kemme bald scho hinter Gitter  
Dangg Thomas Minder, Ständeroot  
Git's nur no Wasser und harts Broot  
Und all die iberzaalte Flusche  
Mien mit dr glyche Saiffi dusche

Mängmool läg s'Gäld schint's uff dr Strooss  
Manager intressiert's nid grooss  
Die kenne sich nid drnoo bugge  
Will iri volle Däsche drugge

Am Schluss blyybd ine s' Gligg no hold  
Will iri Fallschirm sin us Gold  
Millione duet's drum jewils koschte  
Sich z'trenne vo somene Pfoschte

Dr SBB - Andreas Meyer  
Isch zem Byspiil sone Geier  
Verstopfti WC - s'isch e Hoon  
Bringe pro Joor gnapp e Myllion

Mit gschwellter Bruscht ganz zvoorderscht stoot er  
Dr Swisscom Bigboss Carsten Schloter  
Verlocht Milliarde bi de Tschingge  
Und glopft derfir nit emool d'Fingge

Bim neggschte Vars do wird's uns iibel  
Dä handelt drum vom Oswald Grübel  
Mir hänn in griegt - da'sch d' Pointe draa  
Als Stroof fir dr Joe Ackermäa

Und im scheene Wollerau  
Wartet ain' uf d' AHV  
Es wintscht sich dert dr Ospel Marcel  
Fir d' Geehilf e vrgoldets Faargstell  
Dr Philipp Hildebrand hett glacht  
Sich grad dr Bonus sälber gmacht  
Hett zletscht das Gäld nid welle bhalte  
Är haig scho s' Gschängg mit sinre Alte

A propos so Frauegschichte  
Mir mien vom Berlusconi brichte  
Deert griege Frau diggi Boni  
Fyr jede Uffdrift oobe ooni!

Drzue maint dr Herr Berlusconi:  
«ich wär au komblett oobe ooni  
Drumm bruch ich sempre alli Boni  
Fir mini Hoortransplantation!»

Die Situation kennt eskaliere  
Wie sotti d' Schwyz druff reagiere?  
S' gitt nur ai Wäg us däre Noot  
Die Gsalzene in Bundesroot!

[www.diegsalzene.ch](http://www.diegsalzene.ch)

Wotsch d Fasnacht mol vo inne gsee - kumm doch zue dr BSG!  
[www.bsg-online.ch](http://www.bsg-online.ch)